







915302—  
—915331 III

Mag. St. Dr.













915320

III

R. P. D.

BEAUFORT

DE CANILLIAC

Vilnen. Quartæ Funeralis.

Veneris 6. Iunij 1749.



RÆMOTA per Parochum Nouogrodensem instantia super solutione Quartæ Funeralis sibi facienda à Patribus Prædicatoribus eiusdem Lociq; quoties in ipsorum Ecclesia Cadauera Parochianorum tumulari contigisset, singulos excitauit Parochos, & Regulares totius Diocesis, qui Causam hanc communem esse rati, vt sua ipsorum intererat partim præfato Parocho, & partim Conuentui Prædicatorum

A

adhæ-



adhæserunt . Sed quamuis in Iudicio primùm introducto coram Officiali Vilnen. res cesserit iuxta vota Parochorum, contrarium tamen postea censuit A. C. , à cuius Sententia nec difforme fuit Dominorum iudicium , qui in gradu appellationis per Me rogati = *An Quarta Funeralis debeat in casu &c.* = responderunt = *Negatiuè* .

2 Et iure quidem ac meritò , quia nec ex censura *Clementinae Dudum de Sepultur.* , nec ex ordinatione Tridentinae Synodi relata in *cap. 3. sess. 25. de reform.* vlla Regulares Vilnen. Diocesis obligatione adstringuntur , cuius ope ad præstationem Quartæ Funeraliæ à Parochis compelli possint . Idque ad liquidum euincunt amplissima Priuilegia , quibus dd. Regulares à Summis Pontificibus donati fuerunt , & quorum præsidio nemini dubium esse potest , quin ipsi immunes euaserint à solutione Quartæ in *laudata Clementina* præscriptæ , hoc ipso quod Priuilegia huiusmodi , vel præmunita dignoscuntur explicita clausula *eiusdem Clementinae* derogatoria , vel derogatio per æquipollens continetur sub alijs generalibus , & amplissimis Formulis . Quumque ex parte Parochorum non doceatur , quod iidem Regulares per 40. annos ante Concilium Tridentinum Quartam soluere consueverint , quodque intra hoc tempus Priuilegia exemptiua illis superuenerint , nec vlla subest ratio , per quam affirmari possit , talia Priuilegia abrogata fuisse per dictum Concilium , vtpote quod limitate loquitur de Priuilegijs , quæ concessa fuerunt à 40. annis citrà ante illius publicationem , quæque exemptionem continent à solutione Quartæ præstari consueta à 40. annis antè dictam publicationem , quemadmodum explicatiuè tradunt *Barbos. ad idem Concil. sess. 25. de reform. cap. 13. num. 5. , Tondut. quest. Canon. tom. primo cap. 88. num. 2. , Laur. variar. lucubrat. tom. primo tit. 2. cap. 3. num. 183. , Antonell. de Regim. Eccles. lib. primo cap. 13. sub num. 9. , & Rot. post Dian. in Oper. Moral. coordinat. tom. 8. decis. 26. num. primo & sequen.*

3 Quæ sanè omnia aded firma , compertaque erant , vt nec illa in quæstionem adducere ausi fuerint Parochi , qui imò eorum intentionis fundamentum vnicè constituebant in Epistola Pastorali edita anno 1608. à clar. mem. Card. Maczieovvski Archiepiscopo Gnesnen. , ac inserta Synodo Prouinciali celebrata anno 1628. , qua cum cautum fuerit , quodd = *Quart. Funeralium iuxta Sacros Canones , & Constitutiones Synodi salua , & integra maneat Parochiali Defuncti Ecclesie ubicumque is tandem extra illam , electione etiam sua , sepeliatur* = Hinc inferebant dd. Parochi , quod Regulares adstricti remanserunt ad solutionem Quartæ , non obstantibus Priuilegijs eorum fauore militantibus .

4 Verùm difficultas facili negotio concidebat , ponderando , quodd opposita Epistola nec Regularibus excripta est , nec de iis nomina-



minatim loquitur, vnde verius est dicere, quod eius dispositio ad illos non perducatur. Minimè attenta generalitate verborum = *ubicumque is tandem sepeliatur* = sub quibus etiam Regularium Ecclesiæ comprehensæ videri possint. Quia cum talia verba commodè intelligi possint de omnibus alijs Ecclesijs Sæcularibus, quæ nulla gaudent effusissima exemptione, vt sine ampliori controuersia Quartam Parocho Defuncti pendant, hæc porrò interpretatio aptior visa est, & omninò sectanda, cum nouum non sit, quod huiusmodi dictiones, licet vniuersales, restringantur tamen secundum subiectam materiam, vel secundum mentem disponentis ad locum, vbi materia, de qua agitur, procedere potest, ad notata per *Geminian. conf. 92. n. 2.*, *Barbos. dict. 413. sub n. 1.*, & *Rot. in rec. dec. 359. n. 8. par. 14.*

5 Maximè ea accedente peculiari circumstantia, quòd vbi Constitutiones Synodales comprehendere voluerunt Regulares in hac materia Quartæ Funeralis, de illis expressam fecerunt mentionem, prout eruitur ex Constitutione Synodali Cracouiensi. anni 1711., & ex alia Diocesis Vilnensi. anni 1713. quamuis Constitutiones huiusmodi, vtpotè nulliter editæ, & à Sede Apostolica non confirmatæ, nunquam in hac parte obseruatæ fuerunt: Quocirca cum in Epistola Pastoralis Cardinalis Maczieovvski, & in Synodo Prouinciali Gnesnensi. nulla de Regularibus in hoc proposito Quartæ Funeralis habita fuerit mentio, id quidem argumento est, eos non fuisse in illis comprehensos, ad *vulgat. Text. in leg. fin. §. Sin autem Cod. de caduc. tollen.*

6 Certius autem quia laudatus Cardinalis in sua Epistola nihil noui ex se censuit præcipere, sed arctius optauit implementum Sacrorum Canonum; Quare nihil egit, vt exemptionum priuilegijs derogatum censeatur, si ne generale quidem Tridentinum Concilium existimauit omnia, & quæcumque priuilegia abrogare, sed recentia duntaxat per 40. annos ante concessa, & hoc amplius cum restrictione ad illos Regulares, qui intra metam 40. annorum consueuissent Quartam persolvere, vt latius supra obseruatum fuit. Ne itaque plus voluisse videatur Cardinalis, quàm Concilium Tridentinum præscripserit, concludendum omninò est, quod per illa verba = *iuxta Sacros Canones* = illa præseruauerit tum decreta eiusdem Concilij, tum etiam priuilegia per Summos Pontifices Regularibus concessa, quando signanter nulla est difficultas quin hæc omnia complecti possint sub verbo *Canon.*, in latiori præsertim significatu sumpto, ad *Text. in Can. Habeo distinct. 16.* & *in Can. Nicena Synodus distinct. 31.*, *Abbas in cap. Canonum Statuta de Constit.*, ibique *Felin. num. 1.*, & *Fagnan. num. 30.*, & *seqq.*, *Anaclet. in Ius Canon. lib. primo tit. 2. §. primo num. 7.*, & *seq.*, & *Lauren. in eodem lib. primo quest. 34. num. 2.*



7 Audiri nec meruit, quod *Canonum* appellatione communiter intelligantur Constitutiones clausæ in corpore iuris, non etiam Decreta Sacri Concilij Tridentini, aut Pontificiæ Constitutiones extra Corpus Iuris vagantes. Quidquid enim sit de hac opinione, quam confutant *Barbos. claus. 52. n. 4.*, & *Tambur. de iur. Abbat. tom. 1. disput. 18. quæst. 6. num. 2.*, & *sequen.* Præualuit in præsentī animaduersio, quodd cum verba illa *iuxta Sacros Canones* non fuerint prolata à Summo Pontifice, sed ab inferiore, eorum iusta intelligentia haurienda proculdubio est à potestate illius, qui verba protulit, secundum quam voluntas disponentis metiri debet, ad *Text. in cap. Cum in generali de Offic. Vicar. in 6.*, & *in leg. Lucius §. 21. ff. ad Municipal.*, *Rot. in rec. dec. 273. num. 16.*, & *seq. part. 12. coram Dunozzet. iun. decis. 678. num. 21.*, & *coram Lancett. decis. 1377. num. 6.*; Eaque propter dum solutio Quartæ faciēda *iuxta Sacros Canones* iniungitur in Epistola Pastoralī Cardinalis Archiepiscopi, & in Synodo Gnesnen., vtiq; præseruata dici debent non solum Constitutiones clausæ in corpore Iuris, sed etiam Decreta Sacri Concilij Tridentini, & Constitutiones, ac Priuilegia Summorum Pontificum; Quippe quia nec Cardinalis Archiepiscopus, nec Synodus Prouincialis potestatem habent ijs derogandi, *cap. Innotuit de elect.* & *in extrauagant. Sancta Romana §. Quidam autem de Relig. Domib.*, & ibi *Glossa verb. Concilij, Gratian. discept. for. cap. 925. num. 4.*, *Piton. discept. Eccles. 93. num. 23. tom. 3.*, & *Rota coram Molin. decis. 815. num. 10.*, & in specie, quodd dicta Synodus Gnesnen. potestatem non habuerit derogandi Priuilegijs Regularium probat *Fagnan. in cap. Quod super his num. 24. vers. Vnde Synodus de maior.*, & *obedient.*

8 Absque eo quod officere potuerit, quodd enunciata Synodus Gnesnen. edita anno 1628. confirmata fuerit à san. mem. Urbano VIII., quodque hoc amplius in Literis Apostolicis eiusdem confirmationis cautum extiterit, vt Constitutiones Synodales ab omnibus personis Ecclesiasticis, tam Sæcularibus, quàm Regularibus obseruarentur. Nam quoties ex supra firmatis caput illud Synodi Prouincialis, seu veriùs Epistola Pastoralis clar. mem. Cardinalis MaczieoyvsKi, vbi agit de Quarta Funerali, non afficit Regulares, siue quia de iis non loquitur, siue quia se refert ad Sacros Canones, siue etiam quia potestas statuentis ad id non porrigebatur, profecto confirmatio Apostolica non est diuersimodè accipiēda, cum ea sit confirmationis indoles, vt robur tribuat actui confirmato, at non etiam, vt eius dispositionem extendat vltra id, quod in eo continetur *Rot. in Recent. decis. 163. num. 7. part. 15. decis. 377. num. 18. part. 17. coram Molin. decis. 1015. num. 9.*, & *sequen.*, & *in Tirasonen. Iurisdictionis, & Præeminentiarum 15. Ianuarij 1734. in fin. coram clar. mem. Card. Calcagnino.*



- 9 Nec maius fundamentum constitui posse visum est in eo, quod in enunciato Breui confirmatorio mentio etiam fiat de Regularibus. Quandoquidem cum in Synodo Prouinciali, cui Confirmationis Apostolicæ munimen accessit, illa sola non adesset Sanctio respiciens solutionem Quartæ Funeralis, sed & aliæ plures existerent promiscuè afficientes, tam Sæculares, quàm Regulares, qui in pluribus casibus subsunt Iurisdictioni, siue ordinariæ, siue delegatæ Episcoporum, ac tenentur ad obseruantiam Constitutionum Synodaliũ, atque Prouincialium, quos casus latè recenset *Sanctissimus Dominus Noster in suo eruditissimo Tractatu de Synodo Diocesana lib. 7. cap. 41. & duob. seqq. & lib. 8. cap. 4. num. 5. & seqq.* hinc mentio Regularium in Breui confirmatorio facta intelligenda est relatiuè ad huiusmodi casus, & ad ea Synodi capita, in quibus Regulares comprehenduntur, ad regulam, de qua *Fachin. controu. iur. lib. 7. cap. 64. Rota in Rerent. decis. 192. num. 6. part. 8. coram Seraphin. decis. 1023. num. 4. & coram Molin. decis. 1225. num. 14.* ; Eo vel magis quia dicta confirmatio fuit à Summo Pontifice concessa habito prius examine, ac voto Sacræ Congregationis Concilij, quæ nunquam approbat, sed imo delere solet Decreta omnia Concilij Prouincialis quoquo modo violantia exemptiones, & Priuilegia Regularium, vt notat *Fagnan. in cap. Quod super his num. 24. in fin. de Maiorit. & obedient.*
- 10 Atque hinc frustra obtrudebatur clausula generalis = *non obstantibus quibuscumque* = adiecta in fine Breuis confirmatorii. Quia cum nec in actu confirmato, nec in ipso Breui confirmatorio vlla adsit mentio Regularium in proposito Quartæ Funeralis, nec vllibi innuantur Priuilegia illos eximentia à solutione eiusdem Quartæ, nil sanè minus erat quàm vt per dictam clausulam generalem derogatum fuisse dici posset enunciatis Priuilegijs, pro quo imò effectu necesse est, vel quod concurrat derogatio expressa, vel quod lex, seu Constitutio posterior implicet contrarietatem, seu incompatibilitatem cum antecedentibus Priuilegijs, quodque huiusmodi contrarietas sit in se adedò clara, ac manifesta, vt quamlibet excludat conciliationem, quæ vbi aliquo modo possibilis detegatur, semper fieri debet ad euitandam exosam derogationem anteriorum Priuilegiorum, ad ea, quæ in specie tradunt *Passerin. in cap. 1. de Constit. in 6. num. 120. Pignatell. consult. 107. num. 10. tom. 10. & Rot. coram Molin. decis. 676. num. 13. & seq.*
- 11 Hactenus dicta etsi satis perspicua per se visa fuerint, potiores adhuc assumunt vires à subsecuta conformi obseruantia, de qua testimonium perhibent Viri omni exceptione maiores, nempe Magistratus, Proceres, Ordinesque vniuersi Magni Ducatus Lithuanix, vno ore deponentes, quòd Regulares nun-



nunquam Quartam Funeralem Parochis præstiterunt . Quodque magis in rem est , hanc eandem negatiuam obseruantiam comprobant ipsimet Testes in contrarium adducti , qui licet deponant de petitionibus Parochorum , in substantia tamen conueniunt , quod Regulares dictam Quartam non persoluerint . Exinde autem affirmari tutò potest, Constitutionem Synodalem loquentem de Quarta Funerale non afficere Regulares, cum obseruantia sit optima interpret Constitutionum, tum Apostolicarum , tum Synodaliũ , ad *Text. in cap. Cum dilectus 8. de consuet., Rot. cor. Caprar. dec. 421. n. 6., & dec. 704. sub n. 3., & seq., & cor. Molin. dec. 748. n. 36.* ; Haud attentato decreto irritante , quod adiectum fuit in antedicto Breui *Vrbani VIII.* ; Cum illud solũ impediatur ne induci possit contraria præscriptio , at non etiam impedimento sit ne dispositio eiusdem Breuis interpretationem recipere debeat ab obseruantia , vt appositè respondit *Rot. in Vormatien. Beneficij 5. Decembris 1735. §. 7. coram Eminentissimo D. meo Cardinali Crescentio.*

- 12 Astipulatur etiam in eadem linea interpretatiua Lis acta anno 162. in Sacra Congregatione Concilij inter Fratres Minores de Obseruantia Poloniae , & Parochos , nec non Decretum inibi editum die 14. *Novembris eiusdem anni*, quo declaratum fuit , onus probandi consuetudinem soluendi Quartam per 40. annos ante Concilium Tridentinum pertinere ad Parochos . Hoc quippe Decretum per extensum relatum à *Mattheucc. Official. Cur. Ecclesiast. cap. 42. num. 9.* , necessariò præsupponit , per Concilium Prouinciale , & Breue *san. mem. Urbani VIII.* non fuisse derogatum Priuilegijs Regularium , alioquin inepta fuisset illa disputatio , nec Parochi recursum , habuissent ad dispositionem Sac. Concilij Tridentini .  
Et ita vtraque &c.


R O M Æ , MDCCXLIX.

Ex Typographia Reverendæ Camerae Apostolicæ.  
*Superiorum Permissu.*



REPORT  
REAUFEORT  
DE CANILLAS







B 6008 5





